



ХӨДӨЛМӨР, НИЙГМИЙН ХАМГААЛЛЫН ЯАМ  
САЛБАРЫН УЛСЫН ЕРӨНХИЙ БАЙЦААГЧИЙН  
АЛБАН ДААЛГАВАР

2024 оны 03 сарын 29 өдөр

Дугаар 09/00-00/001-06

Улаанбаатар хот

Эрчим хүчний салбарт хөдөлмөрийн аюулгүй байдал, эрүүл ахуйг хангаж ажиллах тухай

Сүүлийн жилүүдэд ажилтан хүн ажил үүргээ гүйцэтгэх явцдаа үйлдвэрлэлийн осолд өртөн бэртэж гэмтэх, амь насаа алдах тохиолдлууд олноор гарч, 2023 онд эрчим хүчний салбарт нийт 14 үйлдвэрлэлийн осол, хурц хордлого бүртгэгдсэнээс 5 хүн хөнгөн, 6 хүн хүнд, 3 хүн амь насаа алдсан харамсалтай тоо мэдээ байна.

Иймд эрчим хүчний салбарын ажилтны амь нас, эрүүл мэндийг хамгаалах, эрүүл аюулгүй ажлын байрыг бий болгоход ажлын байранд Хөдөлмөрийн аюулгүй байдал, эрүүл ахуйн хууль тогтоомжийн хэрэгжилтийг хангах, үйлдвэрлэлийн осол, хурц хордлого, мэргэжлээс шалтгаалсан өвчнөөс урьдчилан сэргийлж хөдөлмөрийн аюулгүй байдал, эрүүл ахуйн үр нөлөө бүхий удирдлагын тогтолцоо /менежмент/-г төлөвшүүлэх шаардлагатай байна.

Үүнтэй уялдуулан ажил олгогч Та бүхэнд хандан ажилтан хүний амь нас, эрүүл мэндийг хамгаалах үүднээс Хөдөлмөрийн аюулгүй байдал, эрүүл ахуйн тухай хууль, дүрэм, журам, стандартын шаардлагыг ханган ажиллахыг ДААЛГАЖ байна.

1. Хөдөлмөрийн аюулгүй байдал, эрүүл ахуйн талаарх хууль, тогтоомж, үндэсний стандарт, түүнтэй холбогдуулан гарсан дүрэм, журмын хэрэгжилтийг мөрдөж ажиллах;

2. Аж ахуйн нэгж, байгууллагын үйл ажиллагааны онцлогт тохирсон хөдөлмөрийн аюулгүй байдал, эрүүл ахуйн дүрэм журам, холбогдох эрх зүйн бичиг баримтыг шинэчлэн боловсруулж мөрдөх;

3. Эрчим хүчний салбарын 2023-2024 оны хамтын хэлэлцээрээр тохиролцсон хөдөлмөрийн харилцаа, хөдөлмөр эрхлэлтийн нөхцөл, хөдөлмөр зохион байгуулалт, цалин хөлс, хөдөлмөрийн аюулгүй байдал, эрүүл ахуйг хангаж ажиллах;

4. Ажлын байранд, ажил үүргээ гүйцэтгэх явцад тохиолдож болох аюулыг тогтоох, үнэлэх, бууруулах, арилгах зорилгоор эрсдэлийн үнэлгээ хийж, учирч болзошгүй аюул, ослоос урьдчилан сэргийлэх арга хэмжээг авч ажиллах;

5. "Аюул, ослоос урьдчилан сэргийлэх төлөвлөгөө" боловсруулж энэхүү төлөвлөгөөнд эрүүл, аюулгүй ажлын байрыг бий болгох, ажилтнуудын эрүүл мэндийг хамгаалах, тохиолдож болзошгүй аюул ослоос урьдчилан сэргийлэх, тоног төхөөрөмжийн аюулгүй ажиллагааг хангах, ажлын үе шат бүрт авах хөдөлмөрийн аюулгүй байдал, эрүүл ахуйн арга хэмжээг нарийн төлөвлөж, хэрэгжилтийг хангаж ажиллах;

6. Ажилтанд зориулсан хөдөлмөрийн аюулгүй байдал, эрүүл ахуйн талаарх сургалтыг жилд хоёроос доошгүй удаа зохион байгуулж, нийт ажилтныг хамруулах;

7. Эрсдэлтэй ажлын байранд ажилладаг ажилтныг эрсдэлтэй ажлын байрны болон тусгай (химийн хорт ба аюултай бодис, тэсэрч дэлбэрэх бодис, тэсэлгээний хэрэгсэл, цацраг, биологийн идэвхт бодис, түүний нөлөөлөл) сургалтад хамруулан, өөрийгөө болон бусдыг аюул, эрсдэлд учруулахгүй байх мэдлэг, чадвар, дадлагыг ажилтан бүрт эзэмшүүлэх;

1511190023



8. Ажлын байран дахь хөдөлмөрийн аюулгүй ажиллагааны 3 шатны зааварчилгааг ажил үүргийн онцлогт нийцүүлэн тухайн асуудал хариуцсан инженер техникийн ажилтан, удирдах албан тушаалтан тухай бүр, тогтмол өгч хэвших, хяналт тавих;

9. Аж ахуйн нэгж, байгууллага нь Эрчим хүчний сайдын 2014 оны 101 дугаар тушаалаар баталсан "Цахилгаан байгууламжийн ашиглалтын үед мөрдөх аюулгүй ажиллагааны дүрэм"-ийг үйл ажиллагаандаа мөрдөж ажиллах;

10. Хөдөлмөрийн аюулгүй байдал, эрүүл ахуйн урьдчилан сэргийлэх арга хэмжээний зардлыг хуульд заасан хэмжээнд төлөвлөн зарцуулж хэвших;

11. Байгууллагын түвшинд хөдөлмөрийн аюулгүй байдал, эрүүл ахуйн удирдлагын тогтолцоог нэвтрүүлэн, үйлдвэрлэлийн осол, хурц хордлогыг судлан бүртгэх орон тооны бус байнгын комисс болон хөдөлмөрийн аюулгүй байдал, эрүүл ахуйн алба, ажилтныг хууль тогтоомжид заасан бүтэц орон тоогоор ажиллуулах, мэргэшүүлэх;

12. Үйлдвэрлэлийн осол, хурц хордлого гарах бүрт Засгийн газраас тогтоосон дүрмийн дагуу үйлдвэрлэлийн осол, хурц хордлогыг судлан бүртгэж, шалтгааныг тогтоон дахин уг шалтгаанаар осол гаргуулахгүй байх талаар бодитой арга хэмжээг төлөвлөж ажиллах;

13. Цахилгаан байгууламж ба түүний хамгаалалтын бүсэд аюулгүй ажиллагааны дүрмийн шаардлагыг хангуулан, аюулгүй ажиллагааны заавар, дохио, санамж тэмдэгүүдийг байршуулан, гарч болзошгүй ослоос урьдчилан сэргийлэх хэрэгслээр тоноглогдсон байх;

14. Ажилтныг олон улсын стандарт, шаардлагад нийцсэн чанарын баталгаа бүхий ажлын тусгай хувцас, хамгаалах хэрэгсэл, багаж тоног төхөөрөмжөөр хангах, зориулалтын дагуу бүрэн хэрэглэж хэвшүүлэх, ажлын тусгай хувцас, хамгаалах хэрэгслийн эдэлгээний хугацааг судалгаанд үндэслэн, нэр, төрөл жагсаалтыг баталж мөрдүүлэх;

15. Ажил олгогч нь эрүүл мэндийн асуудал эрхэлсэн төрийн захиргааны төв байгууллагаас тогтоосон журмын дагуу үйлдвэрлэл, ажил, үйлчилгээтэй холбоотой, зайлшгүй шаардлагатай эрүүл мэндийн урьдчилсан болон хугацаат үзлэгт ажилтныг тогтмол хамруулах;

16. Инженер техникийн ажилтан, үйлдвэрийн ажилтнуудад эрүүл мэндийн боловсрол олгох, аливаа өвчнөөс урьдчилан сэргийлэхэд чиглэсэн сургалтыг мэргэжлийн байгууллагуудтай хамтран зохион байгуулах;

17. Ажил олгогч ажлын байранд эргономикийн хүчин зүйл, дуу шуугиан, доргион, химийн бодисын ууршилт, эрдсийн тоосноос ажилтны эрүүл мэндэд үзүүлэх эрсдэлийг үнэлэх, түүний нөлөөллийг бууруулж, ажилтны эрүүл мэндийг хамгаалах үйл ажиллагааг хэрэгжүүлэн, мэргэжлээс шалтгаалсан өвчнөөс урьдчилан сэргийлэх арга хэмжээ авах;

18. Тоосны бохирдлыг эх үүсвэрээс цуглуулах инженерийн хяналтыг хэрэгжүүлэх /механик агааржуулалтын систем төлөвлөх/, тоос их үүсгэдэг туузан дамжуургыг тоос соруулах эсвэл ус цацах системээр тоноглох, ажлын байранд хуримтлагдсан нүүрсний тоосыг бууруулах арга хэмжээ авах;

19. Асбесттэй холбоотой ажил хийгдэж байгаа ажлын талбай руу орох хэсэгт, ажилтны нүдэнд харагдахуйцаар анхааруулах тэмдгийг байрлуулах; /Анхааруулах тэмдэглэгээнд АСБЕСТ АЮУЛТАЙ, ХОРТ ХАВДАР ҮҮСГЭГЧ, УУШГИ ХОРДУУЛАГЧ ЗӨВХӨН ЗӨВШӨӨРӨЛТЭЙ ХҮН НЭВТРЭХ мэдээллийг агуулсан байна./

20. Асбест агуулсан материалтай ажлын талбайд цөөн ажилтан ажиллуулах, шаардлага хангасан амьсгал хамгаалах хэрэгслээр бүрэн хангаж, хэрэглээнд нь хяналт тавих;

21. Ажилтны ахуйн байр /хувцас солих, амрах, хооллох, усанд орох, гар угаах, бие засах газар, хувцас угаалгын газар/-ыг эрүүл ахуйн стандарт шаардлагын дагуу төлөвлөж, цэвэрлэгээ ариутгал халдваргүйжүүлэлтийг тогтмол хийж хэвших, ажилтны тооноос хамааруулан шүршүүр, суултуур, угаагуурын тоог нэмэгдүүлэх, ажлын байранд ундны цэвэр ус, түр амрах байраар хангах, гэмтэл, бэртэл тохиолдох үед үзүүлэх анхан шатны тусламжийн бэлэн байдлыг хангуулах;

22. Ажилтныг илчлэг, чанар сайтай, амин дэмээр баялаг хоол хүнсээр хангах замаар ажилтны эрүүл мэндийг хамгаалах, хөдөлмөрийн бүтээмжийг дээшлүүлэхэд дэмжиж ажиллах;

23. Эрсдэлийн түвшин их ажлын байранд ажиллаж байгаа ажилтныг амь нас, эрүүл мэндийн даатгалд тухайн ажилтны 36 ба түүнээс дээш сарын дундаж цалинтай тэнцэх хэмжээгээр заавал даатгуулах;

24. Аж ахуйн нэгж, байгууллагын газар, хэлтэс, нэгжийн хөдөлмөрийн аюулгүй байдал, эрүүл ахуйн үйл ажиллагаанд дотоод хяналтын тогтолцоог нэвтрүүлж, техникийн бүрэн бүтэн байдал, хэвийн үйл ажиллагааг хангах замаар үйлдвэрлэлийн осол, хурц хордлогоос урьдчилан сэргийлэх арга хэмжээг авч хэрэгжүүлэх.

Энэхүү албан даалгаврыг аж ахуйн нэгж, байгууллагын ажил олгогч бүр хэрэгжүүлэн, биелэлтийг үйл ажиллагаа эрхэлж буй нутаг дэвсгэрт хамаарах аймаг, дүүргийн Засаг даргын дэргэдэх Хөдөлмөрийн аюулгүй байдал, эрүүл ахуйн зөвлөл болон Хөдөлмөр, халамжийн үйлчилгээний газарт 2024 оны 10 дугаар сарын 15-ны дотор хүргүүлэн, орон нутгийн зөвлөл нь албан даалгаврын биелэлтийг зөвлөлийн хурлаар хэлэлцэн, цаашид хэрэгжүүлэх зөвлөмж, шийдвэр гаргаж ажиллахыг даалгаж байна.

САЛБАРЫН УЛСЫН  
ЕРӨНХИЙ БАЙЦААГЧ



Б.НАРАНГАРАВ

Хүвчлэл:  
Хянасан:  
Боловсруулсан: